



Karama za Rohoni

Somo la Juma Hili:

1 Kor. 12, Efe. 4:11–13, 1 Kor. 13, 1 Pet. 4:8–11, 1 Kor. 14:27, Amo. 3:7.

FUNGU LA KUKARIRI:

“Ufuateni upendo, na kutaka sana karama za rohani, lakini zaidi kwamba mpate kuhutubu” (1 Wakorintho 14:1).

Kama mwili wa mwanadamu, kanisa ni moja lakini lina washiriki wengi, kila mmoja akiwa na wajibu, kazi na karama tofauti. Zikitendewa kazi kwa upendo, karama hizi za Roho zinakuza hali ya umoja inayoakisi tabia ya Mungu mwenye nafsi tatu.

Juma hili tutachunguza 1 Wakorintho 12–14 na mafundisho yake juu ya karama za Roho. Sehemu hii ni sehemu ya kipengele kikubwa kidogo, ambapo Paulo anashughulikia tabia ya Kikristo inayotarajiwa katika mazingira ya kidini (1 Wakorintho 11–14). Jambo kuu analoshughulika nalo Paulo linahusiana na tatizo la mikusanyiko isiyo na utaratibu. Jibu lake kwa tatizo hili ni kwamba kanisa ni mwili ambao viungo vyake vina kazi mbalimbali zinazochangia “kuujenga mwili wa Kristo” (Efe. 4:12). Kwa ufupi, Mungu alilipatia kanisa karama za Roho ili kukuza umoja kupitia utofauti.

Kwa hakika, Paulo bado anakumbuka tatizo makundi aliloshughulika nalo katika sura nne za kwanza za 1 Wakorintho, ambapo jibu la kukosekana kwa maelewano kati ya washiriki wa kanisa ni umoja katika Kristo. Sasa, anafafanua wazo hilo kwa kuwasilisha ufahamu wake juu ya kazi ya karama ya za Roho. Kwa mujibu wa Paulo, umoja katika Kristo na Roho ndio njia pekee ya kuepuka mafarakano.

***Jifunze somo la juma hili kwa maandalizi ya Sabato ya Agosti 8.**

Karama Tofauti Tofauti

Paulo anatambulisha mada mpya katika 1 Wakorintho 12:1, na kanuni “bali, kwa habari ya.” Wanazuoni wanajadili iwapo anazungumzia “karama za Roho” au “watu wa kiroho” kwa sababu kirai cha Kiyunani *tōn pneumatikōn* kinaruhusu tafsiri zote mbili. “Vipawa vya Roho” inapendekezwa kwa kuzingatia 1 Wakorintho 12:4, ambapo Paulo anarejelea kwa uwazi karama za Roho. Katika 1 Wakorintho 12:2, 3, Paulo anaeleza kwamba karama ya kwanza ya Roho ni kukiri kwa ujasiri kwamba Yesu ni Bwana (1 Kor. 12:2, 3). Katika nyakati za Agano Jipya, kusema kwamba Yesu ni Bwana ni kusema kwamba Kaisari si Bwana (Mdo. 17:7; pia Yn. 19:12, 15). Hili lilionekana kama maasi/uhaini dhidi ya mamlaka ya kifalme na, kwa hiyo, adhabu yake ilikuwa ya kifo.

Yesu na Paulo walisisitiza kwamba kumwamini Mungu—licha ya mateso na tishio la kifo—ni karama ya Roho. Kwa kweli, imani ndiyo karama ya msingi zaidi. Haishangazi, imani ni ya kwanza katika orodha ya 1 Wakorintho 13:13. Kwamba imani ni karama ya Roho ni kwa wazi na kauli ya Paulo katika 1 Wakorintho 12:9. Hata hivyo, kuna karama zingine nyingi. Ukweli kwamba Roho Mtakatifu anagawa aina mbalimbali za karama “kwa kila mtu peke yake kama apendavyo” (1 Kor. 12:11) unathibitisha kwamba zote ni muhimu.

SOMA

1 Wakorintho 12:1–6. Kifungu hiki kinasisitiza nini?

Kurudiwa kwa “tofauti” kunasisitiza wingi wa karama. Kile ambacho Paulo anachokiita “karama za Roho” katika 1 Wakorintho 12:1 kinaelezwa katika aya ya 4–6, kwa mtazamo wa aina tatu tofauti: “karama” (*charisma*), “utumishi” au “huduma” (*diakonia*), na “kazi” (*energēma*). Ingawa maneno haya yanamaanisha vitu tofauti, ni muhimu kutoyatofautisha kwa sababu ya ulinganifu wa kifungu. Mtu anapaswa pia kutambua kwamba karama za Roho zimekusudiwa kukuza umoja kwa kuzingatia msingi wa sifa ya utatu wa Mungu (*tazama pia Efe. 4:8–11*). Ingawa Roho huwapa waumini karama, ni Mungu anayewawezesha kumtumikia Kristo katika jumuiya ya waumini (1 Kor. 12:5, 6). Kila muumini amepewa karama ya peke yake (1 Kor. 12:11), lakini zote zinapaswa kunufaisha jumuiya ya waumini kwa ujumla.

Tazama tena msisitizo wa Paulo juu ya umoja. Kwa nini jambo hili ni muhimu sana kwa kanisa?

Umoja kwa Njia ya Utofauti

Lugha ya umoja iliyoanzishwa katika 1 Wakorintho 12:4–6 (“Roho ni yeye yule,” “Bwana ni yeye yule,” na “Mungu ni yeye yule”) inaelezewa katika sehemu iliyobaki ya 1 Wakorintho 12. Hili linathibitishwa na matumizi ya Paulo ya virai kama vile “Roho ni yeye yule” (1 Kor. 12:11), “mwili ni mmoja” (1 Kor. 12:12), “mwili mmoja” (1 Kor. 12:12, 13, 20), “Roho mmoja” (1 Kor. 12:13 [mara mbili]), “vitunzane kila mmoja na mwenzake” (1 Kor. 12:25).

Pamoja na dhana ya umoja, Paulo anaangazia utofauti wa viungo katika mwili wa Kristo kupitia maneno kama vile “viungo vingi” (1 Kor. 12:12, 20), “sisi sote tulibatiwa” (1 Kor. 12:13), “si kiungo kimoja, bali vingi” (1 Kor. 12:14), “mwili wote” (1 Kor. 12:17), “viungo vya mwili” (1 Kor. 12:22, 23), “viungo vyote” (1 Kor. 12:26). Msisitizo huu wa umoja na utofauti unaonesha kwamba karama za Roho zinalenga kukuza umoja kupitia utofauti.

Umoja huu katikati ya utofauti lazima uakisi tabia ya Mungu. Baba ni nafsi moja, Mwana ni nafsi nyingine, na Roho Mtakatifu ni nafsi nyingine. Hawa watatu wanadumisha nafsi zao huku wakifanya kazi pamoja ili kulijenga kanisa na kuliwezesha kwa ajili ya utume (1 Kor. 12:4–6, Efe. 4:11–13).

SOMA

1 Wakorintho 12:12–31. Kwa nini mfano wa mwili na viungo vyake vingi unafaa kuwakilisha kanisa na washiriki wake?

Wazo moja kuu katika 1 Wakorintho 12 ni kwamba ingawa viungo vya mwili vinatofautiana sana (1 Kor. 12:15–20), vyote vinategemeana (1 Kor. 12:21–26). Miguu inategemea macho. Kuona mahali inapopaswa kutembea; kwa upande mwingine, macho hayawezi kugusa chochote—mikono tu inaweza. Pia, wazo kwamba baadhi ya viungo ni vinyonge (1 Kor. 12:22) au havina heshima (1 Kor. 12:23) kuliko vingine ni wazo tu, kwa maana vyote ni muhimu (1 Kor. 12:22).

Cha kusikitisha, kulikuwa na mwelekeo miongoni mwa Wakorintho wa kuthamini karama fulani na kupuuza zingine. Ili kuwazuia Wakorintho wasifanye kosa hili, Paulo alielekeza mawazo yao katika upendo, ambao ni “njia iliyo bora zaidi” (1 Kor. 12:31). Kwa maneno mengine, haidhuru karama ni ipi, ikitumiwa kwa hekima na kwa upendo, inampendeza Mungu.

Tazama orodha za karama katika 1 Wakorintho 12:8–10, 28; Warumi 12:6–8; na Waefeso 4:11. Karama yako ni nini? Unawezaje kuitumia kuujenga mwili wa Kristo?

“Njia Bora Zaidi”

“Upendo si karama moja miongoni mwa nyingi. Ni njia ambayo karama zote hufikia kusudi lake kuu.” — Carl P. Cosaert, “1 Corinthians,” *Andrews Bible Commentary: New Testament* (Berrien Springs, MI: Andrews University Press, 2022), uk. 1643.

SOMA

1 Wakorintho 13:1–7 na 1 Petro 4:8–11. Upendo una kazi gani kuhusiana na karama za Roho?

Wakorintho wa Kwanza 13 inafundisha kwamba ni kwa njia ya upendo tu ndipo karama za Roho zinaweza kutumiwa ipasavyo. Paulo anaanza 1 Wakorintho 13 kwa kudokeza karama zilizotajwa katika 1 Wakorintho 12, ili kusisitiza tu kukosa kwake thamani kama si kuongozwa na upendo. Hivyo, maarifa (1 Kor. 12:8) na imani (1 Kor. 12:9), hata imani “kiasi cha kuhamisha milima” (1 Kor. 13:2), si kitu pasipo upendo (1 Kor. 13:2). Bila upendo, uwezo wa kunena kwa lugha (1 Kor. 12:10, 28, 30) unakuwa tu “shaba iliayo au upatu uvumao” (1 Kor. 13:1). Vivyo hivyo, hata karama muhimu ya unabii si kitu pasipo upendo (1 Kor. 13:2).

Katika 1 Wakorintho 13:4–7, Paulo analenga katika kile upendo ulicho na kile usicho; hasa zaidi, kile upendo uchofanya na kile ambacho haufanyi. Vitenzi alivyochagua kuelezea sifa ya upendo vinaonesha kwamba upendo si kitu ambacho tunahisi bali ni kitu tunachofanya. Hivyo, Paulo anataja kwamba upendo (1) huvumilia; (2) hufadhili; (3) hufurahi pamoja na kweli; (4) huvumilia yote; (5) huamini yote; (6) hutumaini yote; (7) hustahimili mambo yote. Kinyume chake, upendo (1) hauhusudu; (2) hautakabari; (3) haujivuni; (4) haukosi kuwa na adabu; (5) hautafuti mambo yake; (6) hauoni uchungu; (7) hauhesabu mabaya; (8) haufurahii udhalimu.

Jumla hii ya vitenzi 15 inatoa mwongozo thabiti kwa tabia ifaayo katika kuzitendea kazi karama. Kama unavyoonekana, mjadala huu juu ya asili ya kweli ya upendo upo hasa kati ya 1 Wakorintho 12 na 14, ambapo Paulo anashughulikia mgogoro unaohusu karama za kiroho. Kwa kweli, upendo ndio ufunguo wa kutumia karama za Roho kwa hekima. Upendo pia umewekwa sambamba na imani na tumaini, “na katika hayo lililo kuu ni upendo” (1 Kor. 13:13).

Kwa nini upendo ni kiini cha imani yetu? Ni njia gani bora zaidi ya kupata uzoefu wa uhalisi wa upendo wa Mungu kuliko kutafuta kwa maombi kuakisi upendo huo kwa wengine?

Karama ya Kunena kwa Lugha

Vipi kuhusu karama ya kunena kwa lugha? Sambamba na udhihirisho wa karama mahali pengine katika Biblia (*Mk 16:17, Mdo. 2:1–13, Mdo. 10:44–48, Mdo. 19:6*), kuna uwezekano mkubwa karama ya kunena kwa lugha katika 1 Wakorintho ni uwezo unaotolewa na Roho wa kunena kwa lugha za kigeni.

Paulo anataja karama ya kunena kwa lugha katika orodha ya karama katika 1 Wakorintho 12:8–10 (*tazama pia 1 Kor. 12:28, 30; 1 Kor. 13:1, 8*). Hata hivyo, anaiteja tena na tena katika 1 Wakorintho 14. Kwa hakika, neno la Kiyunani *glōssa* (“ulimi”) linaonekana zaidi ya mara ishirini katika 1 Wakorintho 12–14, likitokea mara kumi na tano katika 1 Wakorintho 14 pekee. Kando na haya, neno la Kiyunani *heteroglōssos* (“lugha nyingine”) pia linatokea, katika 1 Wakorintho 14:21. Idadi hii kubwa ya kurejelewa kwa karama ya kunena kwa lugha inapendekeza kwamba jambo hili ni muhimu sana kwa Paulo. Kutumia vibaya karama hii na kanisa la Korintho kulisababisha vurugu na machafuko katika ibada ya hadhara (*1 Kor. 14:23, 27, 33, 40*).

SOMA

1 Wathesalonike 4:1–8. Kifungu hiki kinasema nini kuhusu uhusiano kati ya utakaso na kujiepusha na uasherati?

Sababu ya karama ya kunena kwa lugha lazima iendane na ile ya kuzifasiri ni kwamba lugha ni lazima ieleweke (*1 Kor. 14:9*); vinginevyo, hakuna faida ya kutumia karama hii (*1 Kor. 14:6*). Hili linaeleza kwa nini Paulo anasisitiza sana juu ya fasiri na ufahamu. Kwa wazi, hakosoi karama ya kunena kwa lugha yenyewe, lakini, kama tutakavyoona kesho, umashuhuri mkubwa mno ambao Wakorintho waliipatia, uliosababisha kupuuzwa kwa karama ya unabii.

Katika hatua hii, ni muhimu kutambua kwamba ingawa Paulo alitamani kwamba Wakorintho wote wangeweza kuzungumza lugha za kigeni (*1 Kor. 14:5*), hakutarajia hilo litokee (*1 Kor. 12:10*). Kwa hiyo, wazo kwamba “wote lazima wanene kwa lugha kabla ya kudai ubatizo wa Roho Mtakatifu ni kupotosha mafundisho ya Paulo katika 1 Wakorintho 12 na 14.”—Raoul Dederen, *Handbook of Seventh-day Adventist Theology*, electronic ed., gombo la 12 of Commentary Reference Series (Hagerstown, MD: Review and Herald Publishing Association, 2001), uk. 620.

Je, kuna watu katika kanisa lako wanaozungumza lugha zingine? Wanawezaje kutumia uwezo huu kuwafikia watu wengine kwa ajili ya Kristo? Ukweli huu unawezaje kutusaidia kuelewa asili ya kweli ya lugha Paulo anayozungumzia?

Karama ya Unabii

Karama ya unabii inachukua nafasi kubwa katika mjadala wa Paulo kuhusu karama za Roho. Kwa kuvutia, karama ya unabii kwa kawaida inatajwa kabla ya karama ya kunena kwa lugha (1 Kor. 12:10, 28; 1 Kor. 13:8). Karama ya kunena kwa lugha inapotajwa kwanza, hili linasisitiza tu umuhimu wake mdogo ikilinganishwa na karama ya unabii (1 Kor. 14:4, 5, 6, 22).

SOMA

Waefeso 4:11–13 na 1 Wakorintho 14:3, 4. Vifungu hivi vinasema nini kuhusu kusudi la karama za Roho kwa ujumla na hasa karama ya unabii?

Karama ya unabii inakusudiwa kujenga, kutia moyo, na kufariji (1 Kor. 14:3; *linganisha na Mdo. 15:32*). Hili linadokeza kwamba unabii hauhusu sana kutabiri yajayo bali ni jinsi ya kuishi sasa. Kitenzi cha Kiyunani *prophēteuō* kinaweza kumaanisha ama “kusema jambo kabla” au “kusema jambo kwa niaba ya mtu mwingine.” Kwa mfano, maana ya kwanza inaonekana katika Mdo. 2:29–31 (*linganisha na Amo. 3:7*), ambapo wazo kwamba Daudi ni nabii linafafanuliwa kama “kutabiri.” Maana ya pili inaonekana katika Matendo 15:32, ambapo Yuda na Sila wanatambulishwa kama manabii. “Unabii” wao, hata hivyo, ulijumuisha kuwatia shime na kuwatia nguvu “ndugu kwa maneno mengi.”

Kutoka katika Waefeso 4:11–13, tunajifunza kwamba karama za Roho hazikukomea enzi za mitume. Zinapaswa kudumu mpaka mwisho (Mdo. 2:39). Hata hivyo, ikiwa mtu anadai kuwa nabii, ni lazima atathminiwe kulingana na Maandiko. Kwa ujumla, kanuni nne zinapaswa kukidhiwa. Kwanza, unabii unatimia (Kum. 18:22; Yer. 28:8, 9). Pili, ujumbe unapata na ule wa manabii waliotangulia (Kum. 13:1–3, Isa. 8:20). Tatu, maisha ya kila siku yanaonesha kujitoa kwa Kristo (1 Yoh. 4:1–3). Nne, Yesu alisema manabii wa uongo wangetambuliwa kwa matunda yao (Mt. 7:15–20). Hili pia ni kweli kuhusu manabii wa kweli.

Kitabu cha Ufunuo kinaonesha kwamba karama ya unabii ni sifa inayolitofautisha kanisa la masalio (Ufu. 12:17, Ufu. 19:10). Kama Waadventista wa Sabato, tunaamini kwamba Ellen G. White alipewa karama ya unabii na inaonekana katika maandishi yake.

Ni sababu zipi zote tulizo nazo za kuamini katika karama ya unabii ya Ellen G. White? Ni maswali gani yanadumu kuwepo kuhusu nafasi/wajibu na mamlaka yake?

JIFUNZE ZAIDI

Roswell F. Cottrell, "Spiritual Gifts," uk. 5-16, katika Ellen G. White, *Spiritual Gifts*, gombo la 1.

"Hebu watu waende kufanya kazi zao, wakimtumaini Bwana, Naye atakwenda pamoja nao, akisadikisha na kuongoa roho. Mtenda kazi mmoja anaweza kuwa mhubiri aliye tayari, mwingine mwandishi aliye tayari, mwingine anaweza kuwa na karama ya maombi ya dhati, ya bidii, yenye ari, mwingine karama ya kuimba. Mwingine anaweza kuwa na uwezo wa pekee wa kueleza neno la Mungu kwa uwazi. Na kila karama inapaswa kuwa nguvu kwa ajili ya Mungu kwa sababu anashirikiana na watendakazi. Mmoja Mungu anampatia neno la hekima, mwingine maarifa, mwingine imani. Lakini wote wanapaswa kufanya kazi chini ya kiongozi mmoja. Utofauti wa karama unapelekea utofauti katika utendaji, "bali ni Mungu yeye yule azitendaye kazi zote katika wote" (1 Kor. 12:6).

"Mtu yeyote asidharau karama zinazodhaniwa kuwa ni dogo zaidi. Hebu wote waende kazini. Mtu yeyote asikunje mikono yake kwa kutokuamini kwa sababu anafikiri kwamba hawezi kufanya kazi kubwa. Acha kujitazama. Mtazame Kiongozi wako. Kwa upole, uaminifu, na upendo fanya kile unachoweza."—Ellen G. White, katika *The Advent Review and Sabbath Herald*, Aprili 12, 1906.

"Kila mmoja wetu anahitaji msaada tunaoweza kupokea kutoka katika akili za watu wengine. Mungu atatenda kazi katika akili za watu wengine kuliko zetu. Karama mbalimbali zinazotolewa kwa watu tofauti tofauti zinapaswa kuunganishwa kwa ajili ya 'kuwakamilisha watakatifu, hata kazi ya huduma itendeke, hata mwili wa Kristo ujengwe (Efe. 4:12)...

"Daima kutakuwa na vikwazo mbele yetu, lakini tunapaswa kumfuata Kiongozi wetu, na kukabiliana na matatizo yetu kwa umoja, tukishirikiana."—Ellen G. White, *The Upward Look*, uk. 141.

MASWALI YA KUJADILI

1. Fikiri zaidi kuhusu karama ya unabii. Kwa nini unabii ni muhimu zaidi kuliko lugha ikiwa hazifasiriwi? Ikibidi, soma 1 Wakorintho 14 tena ili kukumbuka hoja za Paulo.
2. Darasani, zungumzia maisha na huduma ya Ellen G. White na kwa nini sisi, kama kaniša, tunaamini kwamba kweli alidhihirisha karama ya unabii. Ni baraka gani kubwa zinaja kwa kanisa kutokana na karama hii? Kuna changamoto zipi pia katika kujua namna bora ya kutumia karama hii?
3. Fikiria watu watatu hadi watano wanaokupenda kwa dhati. Unajuaje upendo wao kwako ni wa kweli? Hili linakumbua nini kuhusu kwa nini Paulo alizungumza sana juu ya upendo katika mjadala wake unaohusu karama za Roho?
4. Ingawa upendo ni muhimu kiasi gani, kwa nini haupaswi kuwa kigezo pekee cha kuamua ikiwa mtu fulani anasema ukweli na anastahili kusikilizwa?